

## **Mattup ere ki sirwe Pool yi riñe a don a Tessaloni**

*En urzi k'ono don kun t'oone adda mattup ettiyo*

Ette mattup ere ki sirwe Pool yi riñe a don i ziipe addan a Isa a geeger Tessaloni. Adda mattup ette y'an di duule sey a urzi kama k'Almasi, wo y'ede suldi'ñ ede a aana, ki poone onniyo kamadi t'a aana geñ me.

Don ongon adda geeger gette an rootiyo Almasi yi-gimo baa, wo don ongo ti diinayan an d'eesiyo: «Almasi botto yi ki gimo ye, wo de onniyo kamadi goppon.» Kane don i ruute onniyo kamadi goppon geñ, an di-toogiyo ki naabo me wo an di rootiyo, an'de: «An niiba man a t'isa ki bita.» Wo de an t'ettiyo ombo ki di don i naabiya. Kono kamo Pool y'an riñe kono y'an di kize wede tuuku ton y'a oomi ti raññadi. Wo y'an ruute son an a seeda zakidi aame an iina dabar ton man, wo an d'ise daayum beehyko ti tuddan me.

### *Toose ki Pool*

<sup>1</sup> Mattup ette i raaniya nun Pool ti Silas wo Timote, a kune don ogiyo ti suma k'Isa a geeger Tessaloni, kune don ki Meegin Raa wo ki Galmeega Isa Almasi. <sup>2</sup> Geñ beeko ti toose ki Meegin Raa ti Galmeega Isa Almasi i koon eggun.

*Booro ere a onniyo k'ita*

<sup>3</sup> Zemba ki nun, i dehu ay di roote daayum koduwo a Raa kono kune geŋ me. Eyye geŋ a urzutú ay di roote koduwo a Raa me, kono urzi zaapu k'addugun a Isa geŋ yi neeriyo ki neeriyo, wo geyyiso ere un d'ede ti tuddugun gette t'aagulu k'aagulu. <sup>4</sup> Kono kamo kaye ulbey ay d'isiyo unse, sundugun ay gi di sedfiyo ye a diine don ki Raa ogiysito ti suma k'Isa, kono kun seedu zakidi a urzi zaapu k'addugun a Isa me, kun d'ombine a dabar ere duwo an unni dabirsa wo ti suldi don oone un ettiyo geŋ me.

<sup>5</sup> Kane suldi geŋ i-kaza Raa yi dekkiyo booro ere ki diine, wo t'urzi kane geŋ kun t'isa don iide kun t'etta ki Moziko Raa. Kono tode gettiyo kun dabirsa me. <sup>6</sup> Derec Raa yon ki diine, kane don un oodibe yeebagun geŋ saŋ Raa y'an d'oodiba yeebadan kay. <sup>7</sup> Wo a kune don oodibe yeebagun geŋ, saŋ kun t'oon puukiyo ti kaye. Geŋ aasa a onniyo ere Galmeega Isa yi-kimo ti kandaane ti maaleekiyagi don toogo, y'a kiza tuddi a duwo pay. <sup>8</sup> Y'etto ti uwo bila bila, kono y'an ti-dooza a kane don i ti toogiyo ki suuniyo Raa wo ki sooru ekk'ono don ki Rabila Majjaanawa ki Galmeegin Isa geŋ me\*. <sup>9</sup> Kane geŋ dangayadan Galmeega y'anni dagga ki daayum, dokki ti daanadi wo dokki ti toogo daryikadi†. <sup>10</sup> Geŋ aasa a onniyo ere Galmeega yi-kimo, inkino man kane donzi an di y' t'omma, wo don pay i ziipe addan a yode geŋ an di seeda giggiran k'unusuwo. Kune pay

---

\* **1:8** 1.8 Kun wollo adda mattup ki Ezayi 66.15. † **1:9** 1.9 Kun wollo adda mattup ki Ezayi 2.10,19,21.

addaga ti kane, kono kun umbe a ono don ay un gizite.

<sup>11</sup> Kono kamo ay ton-di-yo Raa daa puukiyo kono kune gen me. Ay ton-di-yo Raazin y'un di'n ise don iide a urzi lekkiyo ere y'unni wiike. Ay ton-di-yo Raa sey, t'urzi toogadi y'un di'n nooge k'isiyo suldi don pay beehiye kun dehu kun d'ise, kono kun ziipe addugun a Isa. <sup>12</sup> Inkiyo t'urzi kune, duwo an t'imma suma ki Galmeegin Isa, wo yode ton y'un di'n t'imma kay. Suldi pay gen aasa t'urzi beeko Raazin wo ti Galmeegin Isa Almasi.

## 2

### *Munda wede ki poone etto t'onniyo kama Galmeega*

<sup>1</sup> Zamba ki nun, a urzi kama Galmeegin Isa Almasi wo ti ogiysadin ere kan soo a daanadi gette, ay un di rooto: <sup>2</sup> Aame wenda y'un ruuta onniyo Galmeega y'a kimo gette t'iina baa man, gen kesiko eggun ti dagga ye wo kun addira ye. Aame yi ruuta ono en don Raa y'igibo, ise ono en ettiyo ti bize kaye, ise ono en ettiyo t'urzi mattup ere kaye gi riine ton man, onami kun amba ye. <sup>3</sup> Kun i oola urzi a wenda soo ton y'un ti'n mabilda ye t'urzi tuuku ton man. I dehu don baadan Raa an di y' kiigira doo min, san onniyo gette t'a aana kollo, wo son Goole doopide k'oogoro Raa gen tuddi y'a ti kiza do, yon wede Raa y'a yi dagga adda dabar ere ki daayum gen me. <sup>4</sup> Yon gen y'a-tooga, y'a ti-kila tuddi t'ekki suldi pay don duwo an ottilso wo an

elkiyo raazan gen me. Inkiyo y'a t'etta k'adda Boy Raa, y'a-koona addaga y'a t'eesa yode batum miñ Raa\*.

<sup>5</sup> Un dunde ko, suldi don n'un ruute aame nun di kune botto gen me? <sup>6</sup> Wo ankenno, kun suune munda wede i ti y' seedu Goole doopide k'oogoro Raa me. Inkiyo yi kiza tuddi a duwo pay gen a onniyo ere Raa yi dehu danjal. <sup>7</sup> Toogo ere kan ombide i dokkiyo duwo an a di doopide oogoro Raa gette, ankenno ti naabiya adda duniya me. Wo de aame munda wede i ti seedu toogo gette Raa yi y'irga man, tod' ti ki naaba kan ombide ye baa. <sup>8</sup> Inkiyo man, san Goole doopide k'oogoro Raa gen y'a kiza tuddi, wo Galmeega Isa yi-gimo man, y'a yi t'ida ti maaye wede adfa ti bizi, y'a ti y'niida ti toogadi†. <sup>9</sup> Aame Goole doopide k'oogoro Raa y'etto ti toogo ere ki Meeda siitandani gen, y'aasa ita suldi don tuuku ton man i-kaza yon toogo, suldi k'armika, wo ti suldi don i ceeriyo eego ki daggiya duwo‡. <sup>10</sup> T'urzi suldi don ulpi tuuku ton man gen, y'a mabida kane don i t'umbe urzi daggiya genno. Kane an daggiya kono an k'umbe ye, wo an ki ti giyye ye derec ki Raa ere t'an di'n utte gette. <sup>11</sup> Kono kamo Raa y'an d'agisa toogo ere ki daggiya ti di rooniso addan, an d'ambu a suldi don ki lohito k'ono genno. <sup>12</sup> Inkiyo man kane don pay i k'umbe a ono don derec ki Raa ye, wo ulban an isiyo

---

\* **2:4** 2.4 Kun wollo adda mattup ki Daniyel 11.36 wo Ezekiyel 28.2. † **2:8** 2.8 Kun wollo adda mattup ki Ezayi 11.4. ‡ **2:9** 2.9 Kun wollo adda mattup ki Matiye 24.24.

uṅse k'isiyo munda wede ki diine ye geṅ, Raa y'a dɛkka booro eedaṅ.

*Seedu zakidī a urzi zaapu k'adde a Isa*

<sup>13</sup> Zemba ki nuṅ, kune dɔṅ Galmeega yi giyye, i dehu kaye ay di roote koduwo daayum a Raa kono kune geṅ me. Ay isiyo inḱino kono kune Raa y'unni biire t'ume k'eesiyo duniya tooṢ, kono kun d'utte t'urzi naabo k'Unde Kamilenṅ t'un di'n ooyiso kese a Raa, wo t'urzi zaapu k'addugunṅ a dɛrec ki Raa. <sup>14</sup> Geṅ a suldī geṅṅo Raa y'unni wiike t'urzi Rabila Majjaanawa ere ay un gizite te, kono yi dihe kun t'ooney gooliko ti Galmeeginṅ Isa Almasi. <sup>15</sup> Inḱino maṅ zemba ki nuṅ, kun soodo zakidī wo kun ti booho beehiye dooyiso ere ay unni duuye gette, ise kaṅ bizey, ise t'urzi mattup toṅ maṅ.

<sup>16</sup> Geṅ Meeginṅ Raa y'inni giyye, wo t'urzi beekadī y'in ti'n selliyo ki daayum wo in zaapu elkisadiṅ ekki munda wede beehiye. Inḱino ay tondiyo yode Raa ti Galmeeginṅ Isa Almasi batum, <sup>17</sup> kono an un ti'n selle wo an un t'eele toogo kun d'ise daayum beehiye ise t'urzi naabo, ise t'urzi k'ono bizigunṅ toṅ maṅ.

### 3

*Kooke a urzi tondiyo Raa*

<sup>1</sup> Inḱino ki dɛṅgu zemba ki nuṅ, kun tondo Raa kono kaye, kono ono Galmeega a-teepe

---

Ṣ 2:13 2.13 T'ume k'eesiyo duniya too: Adda Mattupiyagi k'ono Raa ti kaaga an riije ti bey geṅ, dɔṅ oṅṅoṅ an'de: «Kune Raa y'unni biire dɔṅ ki poone i ziipe addaṅ a Isa kono kun d'utte...»

kesiko wo dɔŋ pay an di y' t'imme aakede a ize di kune. <sup>2</sup> Kun tondo soŋ kono Raa y'ay ti'n ledɔfe ti dɔŋ ulpi wo bundidi an ay ki d'ise ulsu ye. Derec, dɔŋ baadan an ki ziipe addan a Isa ye.

<sup>3</sup> Wo de yo Galmeega yi seedu zakidi a munda wede yi ruute y'aasa me, y'un t'ela toogo a urzi zaapu k'addugun a Isa wo y'un di'n booha kun ki t'ooro bey Mohita k'oldiko ye\*. <sup>4</sup> T'urzi lekkiyo ere kettiyo kan soo ti Galmeega gette, ay suune adda k'addey munda soo kono kune me: Munda wede ay un rootiyo kun d'ise geŋ kun di y'isiyo, wo kun d'isiyo in kino ki daanagun.

<sup>5</sup> Geŋ Galmeega yi dokko biza k'ulbugun kono kun di geyye Raa, wo kun di seeda zakidi aa ki Almasi y'a ziiɔa zakidi bini dangu.

### *Kooke a urzi naabo*

<sup>6</sup> Zemba ki nun, ay un rootiyo ti suma Galmeega Isa Almasi munda wede kun d'ise'ŋ: Kun ti ledɔfo dokki ti zemba dɔŋ pay i ziipe addan a Isa kane golgagi geŋ me, wo sooruzan a ki t'ettiyo ye a urzi dooyiso ere ay unni duuye te. <sup>7</sup> Kune batum kun suune beehiye mummino kun di dooze urzi lekkiyadey me. Aame kaye di kune geŋ, ay ki likko lekkiyo ere ki dɔŋ golguwo ye. <sup>8</sup> Kaye k'ombadey ay ki tunde bey wenda ye. Wo de ay d'iyye oodibe yeebe ti ormiyo naabo onnu didɔfo toŋ man, kono ay ki dihe ye ay i t'ele attidi a wenda soo toŋ ti diinagun me†.

\* **3:3** 3.3 Kun wollo adda mattup ki Matiye 6.13 wo Zan 17.15.

† **3:8** 3.8 Kun wollo adda mattup ki Naabo dɔŋ zina 20.34 wo 1 Tessaloni 2.9.

<sup>9</sup> Derec, ay d'ede urzi kun ay di'n nooge, wo de ay niibe ti beezey kono kun di wolle urzizey wo kun di dooze. <sup>10</sup> Geŋ inŋkino, aame kaye di kune geŋ ay un di ruute munda wede kun d'ise, ay'de: «Wede yi ki dehu yi ki naabe ye maŋ, ombó toŋ kun i-t'ele ye‡.»

<sup>11</sup> Ay rootiyo inŋkino kono ay ollige rabi-lagun, doŋ onŋon ti diinagun kane golgagi, ita naabadaŋ umbo wo an t'eliyo eedaŋ ki lattiya naabo d'uwó. <sup>12</sup> A kane doŋ inŋkino geŋ, ti suma Galmeegiŋ Isa Almasi ay an t'eele kooke, wo ay an di roote munda wede an d'ise me: Kane batum an naabo t'adde soo k'ombo bizaŋ me.

<sup>13</sup> Wo zemba ki nuŋ, kune'ŋ kun iso beehiyko daayum kun t'orme ye. <sup>14</sup> Aame wede yi tuuga k'ollige k'ono doŋ ay riine adda mattup ettiyo maŋ, kun an yi kaza a zemba wo kun di ledfo ti tuddi me, kono yi seeda sukiyagi. <sup>15</sup> Yoŋ geŋ kun yi wolle aa adu ye, wo de kun y'aapa aakede kun aapuđu leema.

### *Toose ere ki dangu*

<sup>16</sup> Geŋ Galmeega i d'eliyo toose, yode batum y'un elo toose daayum t'urzi tuuku toŋ maŋ, wo yi kooná ti kune pay.

<sup>17</sup> Ono doŋ ki toose eŋ, i raaniya nuŋ Pool batum ti beezó. Geŋ inŋkino n'a-ti raaniya sundó, a mattupiyagó doŋ pay ni raaniya me. <sup>18</sup> Geŋ beeko ki Galmeegiŋ Isa Almasi ti kooná eggun pay.

---

‡ **3:10** 3.10 Kun wollo adda mattup ki 1 Tessaloni 4.11.

**Mattup ki Taasuwa ere Aware  
Mukulu: Mattup ki Taasuwa ere Aware (New  
Testament)**

copyright © 2019 Wycliffe Bible Translators, Inc.

Language: (Mukulu)

Contributor: Wycliffe Bible Translators, Inc.

All rights reserved.

2020-11-19

---

PDF generated using Haiola and XeLaTeX on 21 Feb 2024 from source  
files dated 29 Jan 2022

523c1c0a-f8ac-5d2f-aebe-7063b0de6b23